

Giusep Monn-Flepp, Sedrun

21.8.1914 - 5.5.1998



La veta ei in vegnir ed in ir. La naschientscha ei l'entschatta, la mort la fin da nies viadi terrester. A quels dus eveniments sa negin human untgir. Ils 5 da matg 1998 ha la mort spluntau tier Giusep Monn-Flepp a Sedrun. Ina maligna malsogna haveva spossau sias forzas taluisa, che siu giavisch da puder murir ei ius en vigur.

Naschius ei il Giusep ils 21 d'uost 1914 a Sedrun. Ses geniturs ein stai il Vigeli Monn ord la gronda famiglia dils Monns da tgèsa gronda e Maria Barla Berther da Dieni. Gia 1925 miera quella mumma d'ina pigliola. Anavos restan il bab Vigeli cun otg affons minorents. Da quels era il Giusep il vegl, aschi ch'ei ha tuccau principalmein ad el ed a sia sora Rosa da segidar cun siu bab en casa ed el puresser. Da lezzas uras muncavan ils daners per far segiradas e las instituziuns socialas dil sta-

di eran era buca avon maun. Mo persuenter dev'ei enzatgei bia pli human: Ils vischins fagevan survetschs e segidavan cun quels che havevan da bassegs - e quei lu senza schar pagar.

1938 marida el la Barla Flepp. Els prendan dimora ella habitaziun dado ella casa dil Giusep Flepp, il bab da sia dunna, ed entscheivan cun in agen puresser. La famiglia crescha ad in crescher. Tschun buobas e dus buobs ein la luschezia dils geniturs. Lur finamira ei stada da dar a quels ina bona educaziun.

Las premissas per entscheiver cun in agen puresser ils anno 1938 eran buca fetg bunas. Els proxims onns ha era il Giusep sco biars auters stuiu far bugen ni nuidis bia survetsch militar. Mo cu el era a casa fageva el il pur cun ardiment. Pur ei veramein stau sia clamada preferida. Dasperas ha el fatg il marcadont. Ir per las alps e hanlegiar culs purs, quei eran sias vacanzas. In bi e bein rugalau muvel ei adina stau sia luschezia e quei tochen ils davos onns. Ussa maunca igl idilic maletg dil Giusep cun sias puschas dal temps da primavera giul Drun.

Sco tuts ils Monns da Sedrun dalas generaziuns pli veglias ha era el mess sias forzas a disposiziun a pliras uniuns. Biars onns ha el cantau el chor baselgia ed ei era staus commember activ dalla musica e dall'uniuon da teater. Alla vischernaunca politica ha el surviuso cusseglier da scola e pli tard sco gerau d'agricultura.

Ils davos onns eis el aunc segidaus cun siu fegl Ernst aschi lunsch sco sias forzas han lubiu ei. Gl'atun vargau ha la sanabad sfurzau el e sia dunna da prender dimora en casa da vegls s. Vigeli a Sedrun. Quei pass ei buca ius aschi tgunsch. Capeivel che quei ei stau grev per in um e pur ch'era buca disaus vid in urari ch'ei necessaris per il funcziunar d'ina tala casa.

Ils 5 da matg ha il zenn grond da s. Vigeli annunziau la mort dil Giusep. Per el ei la mort buca veginida tut discus. En preschientscha dalla gronda part da sia famiglia ha el astgau surdar sia olma a siu scaffider. Dieus possi dar al Giusep il ruaus perpeten e cun nus duei el selegrar sin in seveser ella veta perpetna.

Adelgott Berther